

նայ կաթողիկոսի հետևորդներուն: Նորընտիր պատ-
րիարքը՝ Յովհաննէս Մուղնեցի, որ նոյնպէս գացած էր
Իզնիմիտ, կը յաջողի Դաւիթ Արևելցին բերել Պրուսա:
Երեմիա երբ անոնց գալը կը լսէ՝ դուրս կ'ելլէ Տէր Պետ-
րոսի տունէն, նախ ճամբուն վրայ կը համբուրէ եկող-
ներուն աջը, ապա առանց ոչ ոքի բան մը ըսելու՝
վազելով կը հասնի կաթողիկոսին մօտ, ուր կային
վարդապետներ և քաղաքին իշխանները, կը համբուրէ
անոր աջը ու կ'ըսէ. «Հոգևորտէ՛ր, աւետիս քեզ, զի
Յովհաննէս վարդապետն առեալ զԴաւիթ եպիսկոպոսն
եւ գայ»: Կաթողիկոսը շատ կ'ուրախանայ ու Երե-
միայի երեսն ու ճակատը կը համբուրէ և տասը զրուշ-
նոց չուխայ մը կը նուիրէ անոր իբրև աւետչեայ (իբ-
րբառով մուսթուլուխ): Հետեեալ առտուն (Մայիս 22
Կիրակի) Հայրապետին առջև կը հանեն Արևելցին,
զոր խստիւ կը յանդիմանէ ու կ'ահացնէ: Անտոն Զէ-
լէպի իր միւս մեծ տունը բերել տալով Կաթողիկոսը,
որուն ընկերացողներուն մէջ էր Երեմիա, երաշխաւոր
կ'ըլլայ Արևելցիին՝ որ այլևս այդ կողմերը չգեզերի
ու կը խնդրէ Հոգևորտէրէն հետը տանիլ զայն Էջմիա-
ծին. 200 զրուշ կու տայ Արևելցիին՝ պարտքերը հա-
տուցանելու և ճանապարհի պաշար հայթայթելու հա-
մար և 2000 զրուշ ալ կը նուիրէ կաթողիկոսին՝ ինը-
պաստ Մ. Էջմիածնի զանգակատան շինութեան:

Երկու օր վերջ (24 Մայիս Գշ.) Անտոն Զէլէպիի
ազարակը կը հաւաքուին կաթողիկոսին հետևորդ վար-
դապետներն ու քաղաքին մեծամեծները, անոնց հետ
նաև Երեմիա, ու ամբողջ օրը հոն կ'անցընեն ուրա-
խութեամբ: Հետեեալ օրը, Չորեքշաբթի, Հայրապետը
օրհնելով ամէնքը ու հեծնելով իր ջորին կը մեկնի, ու
իրեն յուղարկ գացողները կը դառնան քաղաք: Երե-
միա և իր հայրը Տէր Մարտիրոս և Յովհաննէս Մուղ-
նեցի տակաւին չորս օր կը մնան Պրուսա ու բարեկամ-